

PAR: sr.Armin Konket-Lei di Petroli ta perfekshonamentu di ‘shouruismo’ i ta hasi kompania Petroli i Gas ‘toko’ di minister.

[May 22, 2015](#)

Lei di Petroli ta perfekshonamentu di ‘shouruismo’ i ta hasi kompania Petroli i Gas ‘toko’ di minister.

Parlamentario di PAR, Armin Konket, a bisa di lo no por vota na fabor di e proposishon ku Gobièrnu a presentá pa regulá e relashon entre Gobièrnu i e kompania Petroli i Gas pasó ta trata simplemente di perfekshonamentu di e práktika di shouruismo di e aktual gobièrnu ya ku e ta enserá ku e kompania, di kua ta minister di asuntunan general a nombra direktor i a postulá komisarionan, ta haña man liber pa negoshá ku multinashonalnan ku ke eksplorá awanan teritorial di Kòrsou pa petroli i gas i ku ta e minister ta aprobá e resultado di negoshashon. Ta práktikamente sigur, a base di e kultura polítiko, ku ta e minister mes lo tin tur kos di bisa den e negosiashonnan. A base di e mesun kultura polítiko t’asina ku den Konseho di Minister lo tin un mayoria ku ta sostené tur loke e minister aki disidí. Pone aserka ku Parlamento no tin nada di bisa den e asunto aki, anto por konsiderá ku kompania Petroli i Gas a bira ‘toko’ di minister di asuntunan general. P’esei Konket ta bisa di lo no por vota na fabor di e proposishon di lei aki den e forma aktual. Konket a sostené su pensamentu pa ku e mal uso ku polítika ta hasi di kompania di gobièrnu referiendo na ponensianan ku sr. mr. Karel Frielink i sr. ir. Don Martina a presentá den pasado resien.

Kultura polítiko ta promové ‘shouruismo’

Sr. Frielink, un eksperto riba tereno di ‘corporate governance’ a bisa ku e kondishonnan aktual bou di kua gerentenan di kompanianan di gobièrnu mester funshoná no ta unu sano. Gerentenan di un banda ta keda tené responsabel pa manehá e kompania efektivo i efisiente, miéntras minister i komisarionan ta konstantemente ta pusha pa sinta riba stul di e gerente. Su ponensia ta ku gobièrnu mester hasi un eskoho: Sea ta hasi e kompanianan servisionan di gobièrnu (tur hende ta bira ámtenar) òf ta pone e kompanianan realmente na distansia di polítika i for di esfera di influensia di polítika. Sr. Martina, eks-promé minister, den su diskurso di órden di 15 di desèmber último, a bisa ku polítika lo hasi pueblo un gran fabor si depolitisá i demokratisá postulashon di kandidatonan pa hunta di komisario di NV-nan di gobièrnu. El a mostra riba artíkulo 37 di areglo di estado pa konkluí ku ta Staten den su totalidat ta e representante di pueblo i no e frakshonnan di koalishon so. Ta p’esei no ta korekto ku postulashon di kandidatonan pa hunta di komisario di NV-nan di gobièrnu ta monopolisá dor di partidonan ku ta forma koalishon.

Ehèmpel di ‘Shouruismo’ di gabinete Asjes pa ku kompanianan di gobièrnu eksistente

Realidat di momentu ta ku tin kompania di gobièrnu di kua tin solamente 3 komisario den funshon pa motibu ku gobièrnu ta skohe pa no yena e vakaturanan. E motibu ta opvio. E tres komisarionan ku a sobra a keda nombrá riba proposishon di partido di minister. E presidente di e hunta di komisario ta ‘llave clave’ di minister i ta konsiderá su mes emisario di minister, ta trata na no enbolbí demas komisarionan den desishonnan di moda ku minister por hasi i deshasí den e kompania. E echo ku e situashon aki ta perdurá ta pa motibu ku partido di minister i Konseho di Minister ta konsiderá e situashon komo aseptabel. E situashon, lamentablemente, ta pió ku loke sr. Frielink i sr. Martina a deskribí. E ambiente aki pues ta propisio pa (mal)usa e kompania pa pèrsigui interesnan personal di e minister. P’esei Armin Konket ta bisa di lo no por vota na fabor di e proposishon ku Gobièrnu a presentá pa regulá e relashon entre Gobièrnu i e kompania Petroli i Gas. E proposishon di lei aki ta simplemente perfekshonamentu di práktika di shouruismo di e aktual gobièrnu.

<http://kikotapasando.com/2015/05/22/par-sr-armin-konket-lei-di-petroli-ta-perfekshonamentu-di-shouruismo-i-ta-hasi-kompania-petroli-i-gas-toko-di-minister/>